



Trais dunnas che s'engaschan per las bibliotecas èn noss chantun han preschentà il nov logo da las bibliotecas grischunas (da san.): Anita Devonas, Christine Hollinger e Nelly Däscher.

FOTO G. N. STGIER

Logo chapavel e simpel

Bibliotecas publicas dal Grischun

■ (anr/gns) Il nov logo da las bibliotecas publicas da noss chantun savess esser in segn d'interpunctiun, ina virgula, in accent, dentant eventual era in apostrof. La realitad è che quel nov logo segna per comunicaziun. En l'avegnir vegnan las bibliotecas en noss chantun a sa preschentar cun in logo communabel. Ier è quel logo vegnì preschentà a las medias. Cun duvrar in nov logo stgaffeschon las bibliotecas publicas en il Grischun ina plattafurma communabla. La pli gronda gruppa da las 80 bibliotecas en noss chantun sa cumpona da 54 bibliotecas da scola e communalas. Remarcabel è era che quellas bibliotecas vegnan per gronda part manadas da dunnas. Nelly Däscher, incumbensada dal chantun per bibliotecas, ha ditg che

quellas dunnas lavuran perfin senza indemnizaziun. Las bibliotecas publicas pusibiliteschan a 190 459 abitants dal Grischun da far adiever da 507 845 mediums. Da quels èn radund 65 000 schenumnads «Nonbooks» u ditg auter mediums electronics. L'onn passà han las bibliotecas grischunas emprestà passa in milliun mediums e da quels èn 242 000 mediums electronics sco videos, dvd's etc. Cun organisar occurrenz per vegl e giuven contribueschan las manadras da las bibliotecas era blier per la veta culturala en las vischnancas, ha ditg Anita Devonas, manadra dalla Biblioteca populara dal Grischun. Las bibliotecas sajan savens er en lieu d'antop per creschids, giuvenils ed uffans, cun sparir adina dapli stizuns, postas e bancas.

En tuts trais lungatgs

Il giavisch principal da las manadras e dals manaders da las bibliotecas è da demussar en moda communabla e pli intensiva las prestaziuns e las purschidas da las bibliotecas. Quai vulan ellas cuntanscher cun in logo communabel, che garantescha er da vegnir reconuschì. Il logo che las bibliotecas dal Grischun pon duvrar da nov è in segn cun plets. Il nov logo è chapavel, simpel, marcant e refeltescha la trillinguitad dal chantun. L'apostrof signifitgescha la comunicaziun, il barat, l'emprender e l'instruir. Il logo furma dentant era ina corna stillisada d'in capricorn. Cun duvrar il medem logo duai vegnir garanti che las bibliotecas dal Grischun vegnian indentifitgadas cleramein e che'ellas vegnian reconuschidas.